



# ALUZEN KERAHEZ

(Gwerz savet'vid

Goueliou ha Kavalkaden Kerahez

al lun 8 a viz Ebrel 1901)



Pesort kelou joaüs a red dre ar vro-ma ?  
Kerneviz a veler o tremenn' n'eur gana,  
Merc'het krân deuz ar vro gand o daoulagad skler  
Potred guisket gantê o guiskamanchou kaër !

Payzanted a beb bro a zired a vanden,  
Eul luc'heden esper a zo var dal peb den,  
Arc'hoaz a vo lâret en peb lec'h dre ar vro :  
« Mipien an Tour d'Auvergn' ne n'int ket c'hoaz maro ! »

Kerahez ! Kerahez ! Ker vad kein an Arvor  
Eur fleuren aour ouspen var da dal zo digor,  
Eur fleuren diouanet gant têmez ar garante,  
Gant an aluzennoù dastumet ganit-te !

Rag ar gouel a roer fenez zo eur gouel mad,  
Pell amzer vo dalc'het e jonj gant ar Breizad,  
Hag ar bevien ive, ken karet 'barz hon Bro  
A stanko, vid eun dé, mammennou o daëro.....

Aluzen Kerahez, vel eur boked bleun roz  
A zavo gand an heol betek ar baradoz  
Hag ar bevien vo bet ken rekouret ganti  
A gano d'ar gear-ma enor ha meuleudi

Diredomp 'ta d'ar jeu ! Pell an dristiguez !  
Paour ha pinvidik, stardomp hon daouarn eun devez,  
Ha ma lako peb den e vella bolonte  
Pa lak tud Kerahez o foan, hirio an de.

Kerahez a zavo kenta kear an Arvor,  
P'eo fidel d'ar c'hiz koz, ha fidel d'an enor ;  
Gwir a oa pezh lâre gwechall Napoleon :  
« Pen houarn, kalon aour, ha sethu ar breton ! »

Ia. An daou dra-ze eo karakter ar breizad.  
Mez — eun all a zo c'hoaz 'barz hân'r c'hernevad  
Vid skei var an treïtour e zorn a zo zerret,  
Mez evid rei d'ar paour ema digor bepret !!

*Reproduction réservée.*

JAFFRENNOU.

